

南海縣志卷十一

金石畧一

周

明

秦

漢

吳

晉

唐

南漢

宋

元

周宣王石鼓文

篆書

岐陽石鼓文十碣今在京師國子監先師廟列戟門內左右余曩官監簿時職典守摩杪久矣惜泐蝕太甚僅存三百三十二字世所傳浙江鄞縣范氏天一閣藏元時楊本計存四百八十七字揚州阮文達公元會重摹刻石二一置杭州府學一置揚州家塾甚盛事也余就養東粵次男名澧自都中寄油素雙鉤本是從鄞縣摹出者因選工勒石並題首跋尾寄置吾鄉漢陽府學以廣其傳茲復重爲摹勒留置廣州府學俾同好者共窺古法且以結翰墨之緣云爾

咸豐三年歲在癸丑暮春之初脩禊日漢陽葉志詵
識於兩廣督署福祿壽綿長之居長男名琛侍觀並
監刻

右刻在廣州府學明倫堂凡石十二第一周宣王石
鼓文六字篆書第二至十一石鼓文十二葉志詵題
跋此文摹勒上石在咸豐三年今編於周代者據刻
石鼓文時也文不具錄

秦瑯琊臺碑

篆書

瑯琊臺在山東諸城三面環海秦碑在其上椎拓甚
難蘇文忠守高密嘗摹刻於超然臺今又八百年粵
地又遠秦碑拓本尤不易得乃摹刻舊本於學海堂
爲學篆者法焉同治七年正月陳澧記

右碑嵌學海堂此君亭後文不具錄

漢楊孝元宅甄

佚

案黃通志城南有民張瓊者掘地種冀得一甄云楊孝元宅甄則甄當有字瓊以爲瑞因號南雪白是聰悟漸能賦詩

吳天發神識碑殘本

隸書

右碑在江甯府學尊經閣下嘉慶中燬於火阮文達公重刻於揚州今其石亦不知存否余於番禺陳蘭甫訓導徐子遠上舍兩家藏本摹刻之西樵山三湖書院以永其傳並釋其文於後咸豐十年歲次庚申十月婺源俞文詔記湘西陳泰瞻書古歙許文深監刻

右碑原擬嵌長壽寺補經堂勞文毅公崇光補刻
皇清經解設局寺中俞君許君並襄事焉今實嵌長
壽寺補經堂文暨釋文不具錄

晉光孝寺銅佛背字

楷書

晉太康六年八月十六日東作使張揚刺生得小男藥師留
此上鑄藥師佛願父母眷屬生生見
佛世世聞法道心堅固乃至菩提

按佛現供光孝寺庫房高約二尺餘

永嘉甄十二字

篆書

永嘉世九州荒余廣州平且康

案知稼軒集甄羅羅邨少司農所藏考晉書王機以
永嘉六年據廣州則亦非無事之時也

永嘉甄

建興甄

俱隸書

案阮通志永嘉甄九順德溫氏藏云得於聚龍岡原三十餘出纂志者第見拓本九建興甄一南海顏孝廉斯總藏並錄焉而前邑志但錄建興甄以藏者邑人也今采訪冊南海桂孝廉文燦復得永嘉建興甄各一仍並錄焉又采訪冊番禺許氏復藏永嘉甄三十六出亦云得之聚龍岡但一在嘉慶間一在道光間耳大抵廣州北門外古冢多晉甄而桂孝廉所得未明言其處未知亦聚龍岡否好事者至琢爲硯以相饋然注水卽乾不能研墨但可作明窗清供耳又桂孝廉有甄字拓本跋云此種字體在今則爲隸書而當時匠人寫甄尙皆如此其爲民間通用字體明

甚北朝諸史所稱人善草隸謂世俗通行之字爲隸書也阮文達公謂東晉民間墓甌多出陶匠之手而字跡尙與篆隸相近與蘭亭迴殊近人多執閣帖內二王字跡以概東晉之書皆爲閣帖所愚蔽者此又其一證也

唐故龔州長史女前廣州綏南府別將琅琊王公夫人故費氏墓誌銘并序

楷書

沛國武季元撰

夫人費氏之先肇乎殷代靈源自遠軒蓋相繼祖諱楚廣州清遠縣令父諱瓘龔州長史簪裾之道咸聞令譽夫人柔德斯順韶姿克雍處幽閑以必奉母儀配君子而將惇婦道穠華未謝驚風忽摧乃以唐貞元十九年歲在癸未三月四日卒于南海洞立里之私第四月三日將窆于府城北五里之

野時年卅有四卽遠之禮塗車備列平郊蕭索粧臺寂寥向
微燭而隻影獨傷對總帷而幼子交泣悲夫白駒易往清波
莫返花墮深澗珠沉夜泉畏陵谷之推移紀音容於幽壙勒
銘貞石先昭令儀銘曰

薜華將茂兮空歎朝鮮婉如之人兮不永於年謝三春兮將
歸九泉悲流波而同爲逝川

右碑初爲南海顏仰之上舍購得後歸桂林倪少尹
鴻現藏蓮塘街行庵云將移嵌學海堂此君亭後石
壁

南漢懿陵碑

佚

謹案宋方信孺南海百詠劉氏陵山在郡東北二十
里漫山皆荔子樹龜趺石獸厯厯具存昔有發其墓

者其中皆以鐵鑄之予嘗至此地摩挲斷碑不見始
末但見其詞皆是葬婦人墓誌考之偽史疑是懿陵
也他尚有數處如南海縣宣風鄉及番禺黃陂新會
上臺玉環了髻山等皆有之則碑在南海屬者尙不
止一處舊志缺特補之

南漢地券

楷書

維大寶五年歲次壬戌十月一日乙酉朔大漢國內侍省扶
風郡歿故亡人馬氏二十四娘年登六十四命終魂歸后土
用錢玖萬玖阡玖伯玖拾玖貫玖伯玖拾玖文玖分玖釐玖
毫於地主武夷王邊買得左金吾街咸甯縣北石鄉石馬保
萬蒲觀界地名雲峯嶺下坤向地一面上至青天下極黃泉
東至甲乙麒麟南至丙丁鳳凰西至庚辛童光北至壬癸玉

堂陰陽和會動順四時神龍守護不逆五行金木水火土並
各相扶今日處券應合四維分付受領百靈知見一任生人
興工造墓溫葬亡人馬氏二十四娘萬代溫居永爲古記願
買地內侍省扶風郡歿故亡人馬氏二十四娘義賣地主神
仙武夷王賣地主神仙張堅固知見神仙李定度證見領錢
神仙東方朔領錢神仙赤松子量地神仙白鶴仙書券積是
東海鯉魚仙讀券亢是天上鸛鸛上青雲魚入深泉崑山樹
木各有分林神仙若問何處追尋太上老君勅青詔書急急
如律令

謹案石碣爲會城北李氏得於白雲山麓古壙中今
在下塘村洒家長六寸廣一尺首刻符一道後楷書
十九行共三百二十五字殆南漢地券云考元和郡

縣志隋開皇十年分番禺縣地置南海縣太平寰宇
記南漢乾亨元年析南海爲常康咸甯二縣此碣第
一行云大寶五年歲次壬戌第六行云咸甯縣北石
鄉石馬保菖蒲觀界地名雲峯嶺下大寶爲後主紀
年菖蒲觀蓋今蒲澗寺雲峯嶺蓋今白雲山是隋唐
以來今白雲山麓爲南海縣地又乾亨初龔澄樞知
承宣院兼內侍省中宗時李託選內侍省充宮闈諸
衛押蕃皆爲閹宦之職而乾和中潘崇徹爲內侍省
局丞又似不盡屬閹宦又盧瓊仙黃瓊芝中宗時皆
官女侍中又鄧三十三娘乃宦者龔澄樞妻此碣第
二行第十三行云內侍省扶風郡歿故亡人馬氏二
十四娘馬氏結銜止稱內侍省而不繫夫之姓名則

似盧瓊仙黃瓊芝之屬以鄧三十三娘例之又似宦者之妻疑莫能明也

鐵柱附

案金石以款識爲重此古今通例也然銅柱銅鼓阮通志已竝錄而方孚若南海百詠所記劉氏銅像前邑志已參錄古蹟略元妙觀一條內但刪去狀豪惡可憎俗稱蕃鬼是也數語而鐵柱亦附錄金石略則吳石華學博南漢金石志竝佚之似可不必今考恭巖札記復得鐵柱一則亟錄之曰 國初大城旣克僞官咸遁藩庫吏竊庫鑰而逃百計啟庫鍵不可闢雖礮石攻之弗得蓋庫門有雙鐵柱係僞南漢時故物後懸賞購鑰有南海潘麥陳三姓赴轅投獻兩王

悅厚賞之令三姓世爲庫吏至今不替

宋高宗真草孝經殘碑

經文不具錄

案譜荔軒筆記碑舊在廣州府學宮後廢爲井牀嘉慶十八年脩省志采訪者得之移向明倫堂東序餘詳省志

蘇文忠公六榕兩大字

楷書

謹案阮通志公度嶺以紹聖六年過廣州書此迄今懸寺門原石殆湮沉久矣

觀海堂蘇帖

行書

案蘇文忠公西樓帖詩文二帙吳荷屋中丞榮光所藏宋拓本也廖鹿儕觀察性愛之與孔熾庭太史繼勲選其精者詩二十九首重摹勒石嵌都門南海館

中觀海棠廳廊壁時道光戊戌冬詩不具錄

米芾藥洲詩殘字

楷書

九石

第一行

碧海出蜃閣青空

第二行

起夏雲瑰奇

第三行

怪

石錯落動乾文

第四行

米黻

第五行

熙甯六年七月

第六行

行

案譜荔軒筆記道光丙戌常熟翁文端公心存督粵東學值池水方涸疏淤剔石於仙掌石之旁劈去榕根石骨既呈字跡可辨濯而出之則米元章五言絕句也波磔分明雖碎裂剝泐尙略可識文端書其緣起命題以課士前志所載稍略今特詳紀焉

元延祐

銅壺款

已見前志

謹案咸豐丁巳拱北樓燬避火者分攜壺去庚申勞文毅公崇光懸賞購得之月壺略有損壞其蓋與日

星兩壺蓋均補鑄勒名於末謂其遞滴相傳古人以此長流水制南方丙丁火也置退思軒中同治甲子葺樓成復置舊處

明石香爐太平寺三大字

隸書

案爐勒太平寺三字明洪武間由潯岡太平寺遷置上白沙觀音祠不知何年物

右爐今在泌冲堡白沙鄉觀音祠

丁氏祠堂鐵鐘

陳白沙先生銘曰出佛山治入濟陽堂厥聲鏗鏘震于無疆謹案鐘及銘見陳佛山志

潘氏祠堂記

楷書重刻

一善可書也吾書之吾畏多言也信多乎哉不多也傷俗之

益偷也吾無位也言之不能化而入惡在乎多言也善者吾
斯進之而已矣潘美氏南海之著姓承世澤之後敦善行而
不顧其私曰兄弟之子猶子也同居胞者幾人繼其世者若
干人可以執豆籩可以守宗廟可以事繼述而傳無窮矣吾
何憂乎無繼也以其所有悉公之祠噫是可誌也若是者其
亦足與耶其無足與也堯之時比屋可封降自後世不以義
而以利父子也而不用其情兄弟也而口口口口婦姑勃蹊朋
友按劍者皆是也夫恆人之情莫甚於顧其私而不口其後
美也致孝乎祖禰委祀乎兄弟其生也若遺其死也若虛非
求馬於唐肆者歟未可知也伯氏浩成美之志以其地口祠
堂三間以奉四代神主其田若干畝以供嘗祀詩曰兄及弟
矣式相好矣其斯之謂歟其從子上舍生漢也有一日之雅

于白沙來請記予不能辭也於是乎書竝題藁後四首 萬
事無心鬢已斑五更殘夢斷西山蓬蒿石上君須愛贏得人
看一破顏 秋盡憐君歸去遲枕邊乘快女兒嬉盤飧亦是
閒供給手裏銀杯略遣知 欲寫平生不可心秋燈挑盡幾
沉吟文章信史知誰是且博人間潤筆金 嗜酒音聲古未
嘗誰教長袖舞霓裳茅根總愛名家好不作東坡拗子長
弘治辛亥之吉

翰林院檢討白沙陳獻章拜撰 十七世孫章采敬書

康熙庚戌孟春重脩孫名不具錄

右嵌梯雲堡祠東壁

張詡詠竹詩碑

行書

案張詡別業在詩書街有看竹亭今圯惟詠竹詩碑